

BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM

Broj: 01-02-178/99.

Datum: 09.11.1999.g.

Z A P I S N I K

sa 11.sjednice Predstavničkog doma Parlamentarne skupštine Bosne i Hercegovine,
održane 05.X, 13. X, 27. X. i 09. XI 1999. godine

Jedanaesta sjednica počela je sa radom 5. oktobra 1999. godine u 12,30 sati. Predsjedavao je mr Mirko Banjac, predsjedavajući Predstavničkog doma Parlamentarne skupštine Bosne i Hercegovine.

Sjednici je prisustvovao 31 poslanik – 14 iz Republike Srpske, 17 iz Federacije Bosne i Hercegovine. Odsustvovali su Adnan Jahić, Edhem Bičakčić, Zlatko Lagumdžija, Ivo Mijačević, Pero Skopljak, Ivo Lozančić.

Odsustvo sa sjednice najavili su Ivo Mijačević i Pero Skopljak zbog bolesti, Adnan Jahić, Haris Silajdžić i Zlatko Lagumdžija zbog službenog puta, te Ivo Lozančić zbog porodičnih razloga.

Sjednici Doma prisustvovali su predstavnici Vijeća ministara i međunarodnih organizacija u Bosni i Hercegovini.

Na početku sjednice predsjedavajući je pročitao prijedlog dnevnog reda koji je usaglašen na sjednici Kolegija. Napomenuo je da je Kolegij, u odnosu na prijedlog dnevnog reda koji je dostavljen poslanicima, skinuo dvije tačke – Izvještaj i analiza rada Vijeća ministara i Izvještaj u vezi zahtjeva Kluba poslanika SDP-a, jer za ove tačke nije stigao materijal. O Prijedlogu zakona o praznicima Bosne i Hercegovine Kolegij nije postigao saglasnost, zbog čega je jedan član Kolegija predložio da se ta tačka izdvojeno stavi na glasanje, rekao je predsjedavajući. Zatim je pročitao dopis kopredsjedavajućeg Vijeća ministara Svetozara Mihajlovića u kojem obavještava predsjedavajućeg o razlozima zbog kojih Vijeća ministara nije dostavio traženi materijal.

U diskusiji povodom prijedloga dnevnog reda učestvovali su Sejfudin Tokić, Ibrahim Spahić, Brnko Dokić, Suada Muminagić, Nikla Špirić, Ivo Divković, Tarik Čaršimamović, ministar za spolju trgovinu i ekonomske odnose Mirsad Krutović, Halid Genjac, Miodrag Deretić i Mediha Filipović.

Sejfudin Tokić je u ime Kluba poslanika SDP-a predložio da se u dnevni red uvrsti Izvještaj o organizaciji Samita Pakta o stabilnosti za Jugoistočnu Evropu – finansijski dio i osvrt Vijeća ministara na provođenje Odluke Ustavnog suda o neustavnosti Zakona o Vijeću ministara, te da se otvori rasprava o opozivu Vijeća ministara. Izjasnio se protiv skidanja iznesenih tačaka zbog nedostatka materijala, kao i skidanja Prijedloga zakona o praznicima Bosne i Hercegovine, koji je Klub poslanika SDP-a podnio u junu mjesecu ove godine i isti je prošao svu potrebnu proceduru.

Predsjedavajući Banjac je napomenuo da nije u pitanju skidanje Prijedloga zakona o praznicima nego da u Kolegiju nije postignuta saglasnost, te da će on biti stavljen na glasanje Domu posebno, mimo usaglašenih tačaka dnevnog reda.

Ibrahim Spahić je bio protiv skidanja tačke Izvještaja i analiza rada Vijeća ministara. Predložio je da se u dnevni red uvrsti izvještaj o realizaciji zaključaka iz Rezolucije Parlamentarne skupštine o evropskim integracijama i Paktu stabilnosti za Jugoistočnu Evropu. Zatražio je da Vijeće ministara da informaciju dokle se stiglo sa inicijativom grupe poslanika da Parlament razmatra ekonomsku i socijalnu situaciju u Bosni i Hercegovini koja je Vijeću ministara prosljeđena radi pripreme materijala o tom pitanju. Spahić je postavio pitanje Kolegiju Predstavničkog doma – zašto u dnevnom redu još uvijek nema prijedloga programa rada.

Branko Dokić je podržao zahtjev g. Tokića da se sa dnevnog reda ne skida izvještaj i analiza rada Vijeća ministara. Predložio je da se u dnevni red uvrsti usvajanje programa rada Doma do kraja 1999. godine.

Nikola Špirić je predložio da se u dnevni red uvrsti pokretanje inicijative za opoziv Vijeća ministara, izvještaj o Samitu Pakta o stabilnosti u Jugoistočnoj Evropi i izvještaj parlamentarnih delegacija u međunarodnim tijelima. U vezi sa Prijedlogom zakona o praznicima BiH predložio je da se on povuče dok se ne provede ustavna procedura o pribavljanju ustavnog osnova za donošenje ovog zakona.

Predsjedavajući Mirko Banjac je predložio da se Dom prvo izjasni o predloženim tačkama dnevnog reda koje su usaglašene na Kolegiju, a onda posebno o svakom prijedlogu poslanika.

Sa 27 glasova ZA i 4 protiv Predstavnički dom je usvojio usaglašene tačke dnevnog reda.

Ivo Divković je prigovorio da prijedlog predsjedavajućeg, da se posebno glasa o prijedlogu da se u dnevni red uvrsti Prijedlog zakona o praznicima BiH, nije u skladu sa zaključkom Doma kojim je utvrđeno da se prijedlog zakona, koji je podnio poslanik, ukoliko u roku od 30, odnosno 60 dana Vijeće ministara ne dostavi svoje mišljenje, automatski stavlja u dnevni red.

U ime Vijeća ministara ministar Mirsad Kurtović je iznio razloge zašto Vijeće ministara nije dostavio tražene informacije.

Zatim su se poslanici izjasnili o prijedlozima iznesenim u diskusiji povodom prijedloga dnevnog reda.

Za prijedlog poslanika S. Tokića i B. Dokića – **da se u dnevni red uvrsti izvještaj i analiza rada Vijeća ministara, sa posebnim osvrtom na Odluku Ustavnog suda o neustavnosti Zakona o Vijeće ministara**, glasalo je 20 poslanika, 3 su glasala protiv, a 8 se uzdržalo. Prijedlog je dobio potrebnu većinu, pa je predsjedavajući konstatovao da je uvršten u dnevni red.

Prijedlog Kluba poslanika SDP-a – **da se u dnevni red uvrsti izvještaj o izdavanju pasoša turskom državljaninu Mehrezu Amduniju** usvojen je sa 23 glasa za, 8 poslanika se uzdržalo od glasanja. Prijedlog je dobio i entitetsku većinu.

Zatim je predsjedavajući dao na glasanje uvrštavanje u dnevni red **Prijedloga zakona o praznicima Bosne i Hercegovine**. ZA je glasalo 13 poslanika. Povodom ovog glasanja za riječ se javio Sejfudin Tokić i podsjetio Kolegij da je, prema Privremenom poslovniku, jedna od njegovih obaveza da obezbijedi da sve poslaničke inicijative dođu na dnevni red, a Kolegij se postavlja u funkciju da to sprečava. Naglasio je da je ovim narušeno ustavno pravo poslanika da oni ne prihvataju ovakav ishod glasanja, te da će

Klub poslanika SDP iskoristiti svoja prava da, u skladu sa Ustavom i Privremenim poslovníkom, Prijedlog ovog zakona ponovo dođe na dnevni red.

Predsjedavajući je dao pauzu radi tumačenja Poslovníka u vezi sa utvrđivanjem dnevnog reda, a poslije pauze je upoznao poslanike da nije postignuta saglasnost o ovom pitanju. Naglasio je da u Poslovníku stoji da se dnevni red utvrđuje na početku sjednice. S obzirom da je Prijedlog zakona o praznicima dobio 13 glasova nije uvršten u dnevni red, a da predlagač ima pravo žalbe nadležnim organima.

Sejfudin Tokić je podsjetio na zaključak Predstavničkog doma koji se odnosi na inicijative poslanika, rekavši da nakon što Komisija o ustavnim i pravnim pitanjima da preporuku da prijedlozi poslanika automatski idu u raspravu na Predstavničkom domu. Zatražio je da se glasanje ponovi i izvrši pojedinačnim izjašnjavanjem.

Dalje su povodom ovog pitanja diskutovali Ibrahim Spahić, Halid Genjca, Miodrag Deretić, Sejfudin Tokić i Tarik Čaršimamović.

Gospodin Halid Genjac je podržao prijedlog g. Tokića da se glasanje ponovi i izvrši pojedinačno, dok je Miodrag Deretić osporio pravo na ponovno glasanje jer je isto izvršeno. Tokić je izrazio sumnju u regularnost glasanja i insistirao da se ono ponovi pojedinačnim glasanjem.

Poslije duže replike između Tokića i predsjedavajućeg Banjca, Čaršimamović je u diskusiji, pored ostalog, rekao da se danas o ovom prijedlogu više ne može glasati, te da se prekine ovakva rasprava i uradi bar nešto zbog čega je sjednica sazvana.

Poslanik Tokić je zatražio pauzu, a poslije pauze je obavijestio Predstavnički dom da poslanici SDP-a nisu spremni dalje učestvovati u radu ove sjednice, istakavši, pored ostalog, da je posljednjim glasanjem srušena osnovna funkcija poslanika voljom Kolegija i parlamentarne većine.

Dalje su diskutovali Miodrag Deretić, Nikola Špirić, Ibrahim Spahić, Mediha Filipović, Branko Dokić, Tarik Čaršimamović i Mirko Banjac. Poslije polemične diskusije nastavljen je rad izjašnjavanjem o drugim prijedlozima za dopunu dnevnog reda.

Prijedlog Branka Dokića – **da se u dnevni red uvrsti usvajanje programa rada Predstavničkog doma do kraja 1999. godine**, usvojen je sa 22 glasa za, a 4 poslanika su glasala protiv. Prijedlog je dobio većinu i iz oba entiteta, pa je predsjedavajući konstatovao da je uvršten u dnevni red.

Prijedlog Nikole Špirića – **da se pokrene inicijativa za smjenu Vijeća ministara**, nije usvojen. ZA prijedlog je glasalo 7 poslanika, pa dalje glasanje nije ni provedeno.

Prijedlog Nikole Špirića – **da se u dnevni red uvrsti izvještaj o Samitu Pakta o stabilnosti za Jugoistočnu Evropu – finansijski dio**, usvojen je sa 20 glasova i sa potrebnom entitetskom većinom.

Prijedlog Nikole Špirića – **da se datum potpisivanja Dejtonskog mirovnog sporazuma proglasi praznikom Bosne i Hercegovine** nije usvojen. Od 26 prisutnih poslanika ZA je glasalo 13. Predsjedavajući je konstatovao da nije dobio većinu i da nije potrebno provoditi dalje glasanje.

Sa 24 glasa ZA i potrebnom entitetskom većinom, u dnevni red je uvršten **izvještaj parlamentarnih delegacija BiH u evropskim i ostalim međunarodnim tijelima**.

Predstavnički dom je usvojio prijedlog Ibrahima Spahića – **da se u dnevni red uvrsti Realizacija zaključaka iz Rezolucije o evropskim integracijama i Paktu stabilnosti za Jugoistočnu Evropu**. ZA prijedlog je glasalo 20 poslanika, a dobio je i entitetsku većinu.

Izjašnjavanjem o usaglašenom prijedlogu Kolegija i posebno o svakom prijedlogu iznesenom u diskusiji, za 11. sjednicu Predstavničkog doma Parlamentarne skupštine Bosne i Hercegovine usvojen je sljedeći

D N E V N I R E D:

1. Usvajanje zapisnika sa 9. i 10. sjednice Predstavničkog doma,
2. Prijedlog zakona o reviziji institucija Bosne i Hercegovine,
3. Prijedlog zakona o rješavanju problema 2000. godine u Bosni i Hercegovini,
4. Prijedlog zakona o imigraciji i azilu Bosne i Hercegovine,
5. Izvještaj Komisije o ustavnim i pravnim pitanjima o provođenju procedure glasanja o Nacrtu zakona o osnivanju zajedničkih policijskih snaga za suzbijanje terorizma, međuentitetskog kriminala i neovlašćene trgovine drogom,
6. Izvještaj i analiza rada Vijeća ministara Bosne i Hercegovine,
7. Izvještaj u vezi zahtjeva Kluba poslanika SDP-a Bosne i Hercegovine,
8. Odgovor Centralne banke Bosne i Hercegovine na zaključak Predstavničkog doma broj 03-152/99. od 03.09.1999. godine,
9. Izvještaj o Samitu Pakta stabilnosti za Jugoistočnu Evropu – finansijski dio,
10. Prijedlog programa rada Predstavničkog doma za period septembar-decembar 1999.
11. Izvještaj Parlamentarne delegacije Bosne i Hercegovine u evropskim i ostalim međunarodnim tijelima,
12. Realizacija zaključaka iz Rezolucije o evropskim integracijama i Paktu stabilnosti za Jugoistočnu Evropu,
13. Poslanička pitanja i prijedlozi.

Poslije usvajanja dnevnog reda data je pauza za ručak.

Nakon pauze predsjedavajući je pozdravio ministra odbrane Republike Italije i ambasadora Republike Italije, koji su izvjesno vrijeme prisustvovali sjednici Predstavničkog doma. Potom je nastavljen rad po usvojenom dnevnom redu.

Ad – 1: Usvajanje zapisnika sa 9. i 10. sjednice Predstavničkog doma

Na zapisnike nije bilo primjedbi.

Od 24 prisustva poslanika u vrijeme glasanja, za zapisnike su glasala 23 poslanika, a jedan je bio uzdržan. Predsjedavajući je konstatovao da je usvojen Zapisnik sa 9. i Zapisnik sa 10. sjednice Predstavničkog doma.

Ad – 2: Prijedlog zakona o reviziji institucija Bosne i Hercegovine

Predsjedavajući je pozvao predsjedavajućeg Komisije o ustavnim i pravnim pitanjima da podnese izvještaj Komisije o razmatranju Prijedloga zakona, ali je predsjedavajući rekao da je izvještaj dostavljen svim poslanicima i da nema potrebe za obrazloženjem.

Amandmane na Prijedlog zakona su podnijeli poslanici Milenka Bošnjak, Desanka Rađević i Smail Bećirbašić. Suada Muminagić je amandmane podnijela na početku sjednice u pisanoj formi, ali je dalje sa sjednice morala da odsustvuje.

U ime Vijeća ministara potpredsjedavajući Neven Tomić iznio je stav Vijeća ministara o amandmanima. , a zatim je predsjedavajući pozvao podnositelje amandmana da se izjasne da li odustaju od amandmana koje Vijeće ministara nije prihvatilo.

Diskutovali su Desanka Rađević, Milenka Bošnjak, Nikola Špirić (u diskusiji podnio amandman)

Poslije diskusije predsjedavajući je predložio da se Dom izjasni o svakom amandmanu.

Amandmani Milenke Bošnjak:

- U čl. 6. pod tač. 3. treba reći da se generalni revizor imenuje na tri godine, s tim da se svaki put imenuje iz drugog naroda.

ZA amandman glasalo 11 poslanika. Amandman nije usvojen.

- u tački 6. umjesto broja 2005. treba da stoji br. 2002.

Ovaj amandman je većinom glasova prihvaćen.

- U čl. 16. u tač. 3. riječi “u ime vlade” treba zamijeniti riječima “Vijeće ministara”. To isto treba učiniti u svim ostalim članovima.

Od 24 prisutna za ovaj amandman glasalo je 11 poslanika. Pema tome, amandman nije prihvaćen.

- Član 40. treba brisati jer agencija koja se spominje nije ustavna.

Ovaj amandman je prihvaćen.

Amandmani Desanke Rađević

- U čl. 13. u drugom redu, iza riječi “sva” treba dodati riječ “zajednička”, a u trećem redu umjesto riječi “sudova i organe vlade, javne fondove” treba staviti riječi “ustavnog suda, vijeća ministra”.

Za amandman je glasalo 10 poslanika, pa prema tome nije usvojen. Od drugih amandmana gospođa Rađević je odustala.

Amandman Smaila Bećirbašića je Vijeće ministara prihvatilo djelimično, ali ga je predsjedavajući dao na glasanje. Međutim, interevenisao je Halid Genjac rekavši da je predlagač zakona amandman prihvatio, te da o njemu ne treba glasati. Na to je reagovao Nikola Špirić tražeći da se Dom izjasni o svim amandmanima, pa koji dobije većinu, biće sastavi dio zakona. Naglasio je da je i on podnio amandman, kojim traži da sjedište Kancelarije revizije bude u Banjoj Luci. Odgovorio mu je Neven Tomić podsjetivši da je Predstavnički dom usvojio odluku kojom je određeno da je sjedište svih institucija BiH u Sarajevu u određenoj zoni.

Povodom ovog pitanja dalje su diskutovali Branko Dokić, Ibrahim Spahić, Nikola Špirić, Neven Tomić, Hilmo Neimarlija i Miodrag Deretić.

Poslije diskusije predsjedavajući je dao na glasanje amandman Smaila Bećirbašića koji glasi: “Ured za reviziju institucija BiH ima status pravnog lica. Sjedište Ureda za reviziju je u Sarajevu”.

Za amandman je glasalo 11 poslanika od 24 prisutna. Amandman nije usvojen.

Zatim se Dom izjasnio o amandmanu g Špirića koji glasi: “Kancelarija za reviziju institucija BiH ima status pravnog lica. Sjedište Kancelarije je u Banjoj Luci”.

Za amandman je glasalo 11 poslanika. amandman nije usvojen.

Dom je prihvatio amandmane Suade Muminagić koje je prihvatio i predlagač zakona.

Dom nije prihvatio amandman g. Muminagić koji glasi: “**Funkcija ureda za reviziju je da vrši reviziju institucija Bosne i Hercegovine**”.

Potpredsjedavajući Neven Tomić je podsjetio na amandman - **da se u članu 2. na kraju teksta doda tekst koji glasi: “vlada” – znači Predsjedništvo, Vijeće ministara, ministarstva i druga izvršna tijela zajedničkih institucija Bosne i Hercegovine**”.

Ovaj amandman je prihvaćen.

Pošto se Dom izjasnio o svim amandmanima, predsjedavajući je dao na glasane integralni tekst Zakona.

ZA zakon je glasao 21 poslanik od 24 prisutna, a 3 poslanika su se uzdržali.

Iz Federacije Bosne i Hercegovine glasalo je 10 poslanika, a iz Republike Srpske takođe 10 poslanika.

Predsjedavajući je konstatovao da je Predstavnički dom usvojio Zakon o reviziji institucija Bosne i Hercegovine.

Ad – 3: Prijedlog zakona o rješavanju problema 2000.godine u Bosni i Hercegovini

U ime Komisije za saobraćaj i komunikacije prvi zamjenik predsjedavajućeg Komisije g. Dragan Mirković, obavijestio je Dom da je sjednica Komisije bila sazvana, ali da nije bilo kovoruma za rad. Apelovao je na Kolegij Doma da određenim mjerama utiče na poslanike da aktivno učestvuju u radu radnih komisija. Zatim je iznio svoje amandmane na Prijedlog zakona.

U diskusiji su učestvovali Branko Dokić, Desanka Rađević, Miodrag Deretić i Ibrahim Spahić. Diskutanti su podnijeli i amandmane na Prijedlog zakona.

U ime Vijeća ministara govorio je Jadranko Prlić, koji je iznio i stav Vijeća ministara o predloženim amandmanima.

Predsjedavajući je konstatovao da je Vijeće ministara prihvatilo amandmane g. Dokića i djelimično g. Mirkovića, a da je g. Rađević od amandmana odustala poslije objašnjenja predstavnika Vijeća ministara.

Dom se izjasnio o amandmanu poslanika Miodraga Deretića na član 2. koji glasi: “Ovaj zakon se primjenjuje na teritoriji Bosne i Hercegovine koju čine entitet Republika Srpska i entitet Federacija Bosne i Hercegovine”.

Od 23 prisutna poslanika za amandmane je glasalo 11. Predsjedavajući je konstatovao da amandman nije usvojen.

Zatim je izvršeno glasanje o Prijedlogu zakona u cjelini.

Za Prijedlog su glasala 22 poslanika, a jedan je glasao protiv. Izvršeno je i glasanje po entitetima, pa je iz Federacije BiH glasalo 10 i iz Republike Srpske takođe 10 poslanika.

Predsjedavajući je konstatovao da je usvojen Zakon o Y2K (Zakon o rješavanju problema usklađivanja rada računara u 2000. godini u Bosni i Hercegovini).

Poslije usvajanja prednjeg zakona poslanik Nikola Špirić je upozorio da su poslanici već umorni s obzirom na cjelodnevni rad sjednice. Miodrag Deretić je predložio da se sa 3. tačkom zaključi prvi dio sjednice, a da se o nastavku dogovori Kolegij. Ibrahim Spahić je predložio da na kraju prvog dijela zasjedanja ministar vanjskih poslova Domu podnese informaciju o njegovim kontaktima u Ujedinjenim nacijama. Složio se sa predlozima da se ovim završi rad prvog dijela sjednice, ali pod uslovom da nastavak sjednice krene sa 4 tačkom.

Ministar vanjskih poslova BiH Jadranko Prlić je informisao Predstavnički dom u vezi sa ispunjenjem uslova za prijem BiH u Vijeće Evrope i o drugim pitanjima iz domena vanjske politike, a koja se odnose na Bosnu i Hercegovinu.

Predsjedavajući je konstatovao da izlaganje g. Prlića nije zamjena za 12 tačku dnevnog reda i zamolio ga da poslanicima informaciju dostavi u pisanoj formi.

Poslanik Mediha Filipović je, pored ostalog, informisala poslanike da je sada glavni izvještač za ljudska prava g. Anneli Jaattenmaki umjesto gospođe Gelderbcorn-Lankhout, te o posjeti delegacije Vijeća Evrope Bosni i Hercegovini 21. i 22. oktobra. Predložila je da se izvještaj glavnih izvještača, koji je u prevodu dostavljen poslanicima, dostavi parlamentima entiteta.

Predsjedavajući Mirko Banjac je konstatovao da se prihvata ovaj prijedlog poslanika Filipović i za to obavezao Sekretarijat Parlamenta. Takođe je naložio da Sekretarijat još jedanput urgira kod Vijeća ministara da dostavi materijale za tačke dnevnog reda za koje materijali nisu stigli.

Ovim je zaključio prvi dio sjednice i naglasio da će o nastavu poslanici biti obaviješteni.

Drugi dio 11. sjednice Predstavničkog doma održan je 13. oktobra 1999. godine sa početkom u 12,45 časova.

Nastavku sjednice prisustvovao je 31 poslanik – iz Republike Srpske 12, a iz Federacije Bosne i Hercegovine 21. Odsustvovali su Ivo Mijačević zbog bolesti, Ibrahim Spahić, Tarik Čaršimamović, Vito Rakić, Branko Dokić i Safet Oručević zbog službenog puta.

Prije početka rasprave po 4. tački dnevnog reda – **Prijedlog zakona o imigraciji i azilu**, predsjedavajući je obavijestio poslanike da su danas dobili materijale za 7. i 9. tačku. S obzirom da su poslanici dobili materijale tek na sjednici, zatražio je da se izjasne da li će danas iste razmatrati. Povodom ovog prijedloga predsjedavajućeg diskutovali su Nikola Špirić, Bogić Bogićević i Sejfudin Tokić. U diskusiji su, pored ostalog, istakli da je dnevni red ove sjednice usvojen i da nema smisla ponovo se izjašnjavati ni o jednoj tački.

Poslije diskusije nastavljen je rad po 4. tački dnevnog reda.

Ad – 4: Prijedlog zakona o imigraciji i azilu

Predsjedavajući Komisije o pitanjima ljudskih prava, imigracije, izbjeglica i azila, g. Abdurahman Malkić, podnio je izvještaj Komisije o razmatranju Prijedloga zakona o imigraciji i azilu Bosne i Hercegovine.

Amandmane na Prijedlog zakona podnijeli su poslanici Branislava Jovanović i Miodrag Deretić (preuzeo amandmane koje je na prvom dijelu sjednice podnio poslanik Vito Rakić).

Ministar za civilne poslove i komunikacije g. Marko Ašanin, podnio je izjašnjenje predlagača zakona o amandmanima. Obavijestio je Dom da se Vijeće ministara uglavnom usaglasio o amandmanima, izuzev o amandmanu broj 2. Rakića i Deretića, - **da se u članu 7. iza stava trećeg dodaje novi stav koji glasi: “Na teritoriji BiH bez pasoša i vize, a na osnovu lične karte, mogu ulaziti stranci iz susjednih država sa kojima su entiteti BiH uspostavili specijalne paralelne odnose”**, te o amandmanu broj 1. Branislave Jovanović, - **da se u članu 1. mijenja stav drugi, tako da glasi: “Sva lica koja nisu državljani nijednog od entiteta, odnosno Bosne i Hercegovine u smislu Zakona o državljanstvu BiH, smatraju se strancima”**.

Povodom ovih amandmana diskutovali su kopredsjedavajući Vijeća ministara Haris Silajdžić i Svetozar Mihajlović, te poslanici Sejfudin Tokić, Nikola Špirić, Suada Muminagić, Branislava Jovanović, kao i član Vijeća ministara Jadranko Prlić i njegov zamjenik Dragan Božanić.

Poslije diskusije predsjedavajući je dao na glasanje amandmane koje Vijeće ministara nije prihvatio, a od kojih predlagači nisu odustali.

Za amandman broj 1 poslanika Jovanović, od 32 prisutna poslanika, glasalo je 13, 4 su glasala protiv, a 15 se uzdržalo. Amandman nije prihvaćen.

Dom se izjasnio i o amandmanima broj 2, 3, 4. i 5. poslanika Branislave Jovanović, koji takođe nisu dobili potreban broj glasova.

Dom se takođe izjasnio o amandmanim poslanika Rakića i Deretića. amandmani broj 1, 2, 3, 4. i 5. nisu dobili većinu prisutnih poslanika, te nisu usvojeni.

Poslije glasanja o amandmanima Predstavnički dom se izjasnio o Prijedlogu zakona o imigraciji i azilu Bosne i Hercegovine. U momentu glasanja u sali su bila prisutna 32 poslanika.

ZA Prijedlog zakona glasalo je 18 poslanika 13 je glasalo protiv, a jedan se uzdržao.

Za Prijedlog zakona je glasala većina prisutnih poslanika, pa je izvršeno glasanje po entitetima.

Iz Federacije BiH za Prijedlog zakona glasalo je 16 poslanika. Iz Republike Srpske ZA su glasala 3 poslanika.

Predsjedavajući je konstatovao da Prijedlog zakona nije dobio entitetsku većinu iz Republike Srpske i da ide na usaglašavanje, u skladu sa Privremenim poslovníkom Predstavničkog doma.

AD – 5: Izvještaj Komisije o ustavnim i pravnim pitanjima o provođenju procedure glasanja o Nacrtu zakona o osnivanju zajedničkih policijskih snaga za suzbijanje terorizma i međuentitetskog kriminala i neovlaštene trgovine drogom

Povodom ove tačke dnevnog reda predsjedavajući je saopštio stav Komisije o ustavnim i pravnim pitanjima u vezi sa provedenom procedurom glasanja o predmetnom Prijedlogu zakona, koja je zauzela stav da predsjedavajući tada nije utvrdio kvorum na početku glasanja i smatra da je kvorum činilo 29 poslanika. To znači da je prijedlog dobio većinu prisutnih i da je poslije toga trebalo provesti entitetsko glasanje.

S obzirom da nije tada provedeno glasanje po entitetima, predsjedavajući je predložio da se to sada izvrši.

U ime predlagača nacrta zakona govorio je poslanik Ivo Divković, a potom je o Nacrtu zakona obavljeno glasanje po entitetima.

Iz Federacije Bosne i Hercegovine za Nacrt je glasalo 9, a iz Republike Srpske 3 poslanika.

Predsjedavajući Mirko Banjac je konstatovao da Nacrt zakona nije dobio entitetsku većinu ni iz jednog entiteta i da ide na usaglašavanje.

Ad – 6: Izvještaj i analiza rada Vijeća ministara

Predsjedavajući je podsjetio poslanike da je Kolegij, prema zaključku sa prošle sjednice, Vijeću ministara uputio urgenciju da Parlamentu dostavi materijal za ovu tačku dnevnog reda, te da je u vezi sa tom urgencijom dobio pismo od kopredsjedavajućeg Vijeća ministara Svetozara Mihajlovića, u kojem obavještava da će Vijeće ministara

izvještaj o radu Vijeća ministara za period januar-septembar 1999. godine usvojiti na sjednici 14. oktobra ,nakon čega će ga dostaviti Predstavničkom domu.

Povodom ove tačke dnevnog reda diskutovali su Sejfudin Tokić, Nikola Špirić, Svetozar Mihajlović, Branislava Jovanović, Zlatko Lagumdžija, Nedžad Branković, Marko Ašanin, Halid Genjac, Rasim Kadić i Miodrag Deretić.

U diskusijama su izneseni oprečni stavovi. Jedni su bili mišljenja da o ovoj tački uopšte ne reba raspravljati dok poslanici ne dobiju pisani materijal. Drugi su bili mišljenja da je Vijeće ministara odgovorno za opšte stanje u Bosni i Hercegovini, te predložili da se Dom izjasni o povjerenju Vijeću ministara. Izražena su mišljenja i da je besmisleno izjašnjavati se o povjerenju a da poslanici nisu dobili izvještaj o radu.

Poslije diskusije i više polemika, predsjedavajući je dao na glasanje prijedlog poslanika Tokića da se izglasa nepovjerenje Vijeću ministara. Glasanje je, na prijedlog Tokića i Lagumdžije, obavljeno pojedinačno prozivkom.

Predsjedavajući je, poslije prozivke, konstatovao da je 9 poslanika glasalo za nepovjerenje, 14 je glasalo protiv nepovjerenja, a 6 se uzdržalo. Prema tome, prijedlog da se Vijeću ministara izglasa nepovjerenje nije dobio potrebnu većinu prisutnih poslanika.

Na glasanje nije bilo primjedbi.

Predsjedavajući je zatim konstatovao da je bilo prijedloga da sjednica nastavi rad dalje kao i prijedloga da se sjednica prekine i nastavi za sedam dana. Dao je na glasanje prijedlog da se sjednica prekine i nastavi za sedam dana. ZA ovaj prijedlog glasala su 22 poslanika.

Predsjedavajući je konstatovao da je većinom glasova usvojen prednji prijedlog, te da će poslanici biti obaviješteni o tačnom početku nastavka sjednice.

Drugi dio 11. sjednice završen je u 17,45 časova.

Treći dio 11. sjednice održan je 27.oktobra 1999.godine. Prisustvovala su 34 poslanika . Iz Federacije BiH 21, iz Republike Srpske 14 na početku sjednice, a kasnije 13 jer je poslanika Desanka Rađević sjednucu napustila zbog obaveza u mejsto stanovanja.

Prije razmatranja sljedeće tačke dnevnog reda predsjedavajući Mirko Banjac je upoznao dom o izvještaju Komisije Kolegija o nastojanju za postizanje saglasnosti o Prijedlogu zakona o imigraciji i azilu BiH i Nacrtu zakona o osnivanju zajedničkih policijskih snaga za suzbijanje terorizma, međuentitetskog kriminala i neovlaštene trgovine drogom. Pošto nije postignuta saglasnost predsjedavajući je pozvao poslanike da se izvrši drugi krug glasanja o prijedlozima ovih zakona.

Povodom izvještaja Komisije Kolegija diskutovali su poslanici Suada Muminagić, Branko Dokić, Halid Genjac i Nikola Špirić.

Poslanici Dokić i Špirić su predložili da se odgodi drugi krug glasanja o Prijedlogu zakona o imigraciji i azilu kako bi se učinio dalji napor na usaglašavanju o dva sporna amandmana i kako bi se došlo do zakona. Takođe je predloženo da se zatraži mišljenje od OHR-a, pa ako treba i od Venecijanske komisije, da li su dva sporna amandmana u skladu sa Ustavom Bosne i Hercegovine.

Drugi diskutanti su insistirali na poštivanju poslovničke procedure, tj. da se izvrši drugi krug glasanja o prijedlogu zakona o imigraciji i azilu BiH.

Predsjedavajući je konstatovao da se po Poslovniku dom treba izjasniti u drugom krugu glasanja, izuzev ako Vijeće ministara ne povuče ovaj zakon.

U ime Vijeća ministara govorio je kopredsjedavajući Svetozar Mihajlović, koji je, pored ostalog, rekao da se Vijeće ministara usaglasilo o Prijedlogu zakona, a da o sporna dva amandmana nije postignuta saglasnost, pa da, prema tome, nisu prihvaćeni od Vijeća

ministara. Naglasio je da poslanici mogu davati amandmane o kojima Dom treba da se izjasni, te da Vijeće ministara ne povlači Prijedlog zakona.

Poslije diskusije predsjedavajući je dao na glasanje Prijedlog g. Špirića da se odloži izjašnjavanje o Prijedlogu zakona o imigraciji i azilu dok Kancelarija Visokog predstavnika ne da mišljenje o usklađenosti Amandmana 1. gosode Rađević i amandmanu br. 2. poslanika Rakića i Deretića.

Za ovaj prijedlog glasalo je 14 od 34 prisutna poslanika. Prijedlog, prema tome, nije usvojen.

Zatim se Dom izjasnio o Prijedlogu zakona o imigraciji i azilu.

ZA Prijedlog zakona glasalo je 20 poslanika, 11 je glasalo protiv, a 3 su bila uzdržana.

Prilikom glasanja po entitetima iz Republike Srpske 10 poslanika je glasalo protiv, što je više od dvije trećine.

Iz Federacije Bosne i Hercegovine jedan poslanik je glasao protiv.

Na glasanje nije bilo primjedbi.

Predsjedavajući je konstatovao da Prijedlog zakona o imigraciji i azilu nije dobio potrebnu većinu i da nije usvojen.

Zatim se Dom izjasnio o Nacrtu zakona o osnivanju zajedničkih policijskih snaga za suzbijanje terorizma, međuentitetskog kriminala i neovlašćene trgovine drogom.

ZA Nacrt ovog zakona glasalo je 17 poslanika, što nije nadpolovična većina.

Glasajući po entitetima, 10 poslanika iz RS glasalo je protiv Nacrta zakona, što je više od dvije trećine.

Predsjedavajući je konstatovao da Nacrt zakona nije usvojen.

Poslije glasanja još su diskutovali Miodrag Deretić, Sejfidin Tokić, Alma Čolo i Hilmo Neimarlija.

Ad – 6. Izvještaj i analiza rada Vijeća ministara.

Uvodna izlaganja povodom ove tačke dnevnog reda podnijeli su kopredsjedavajući Vijeća ministara Svetozar Mihajlović i Haris Silajdžić.

U diskusiji su učestvovali Sejfidin Tokić, Ibrahim Spahić, Nikola Špirić, Jadranko Prlić, Branko Dokić, Vito Rakić, Haris Silajdžić, Suada Muinagić, Ivo Divković, Mirko Banjac, Alma Čolo, Tarik Čaršimamović, Hilmo Neimarlija, Miodrag Deretić, Mustafa Pamuk, Abdurahman Malkić i Mara Perkanović.

Poslije diskusije, u kojoj je bilo dosta replika i polemika, predsjedavajući je dao na glasanje Izvještaj o radu Vijeća ministara za period od 01.01. do 30.09. 1999. godine.

Za prihvatanje Izvještaja glasalo je 15 poslanika (28 poslanika prisutno u sali u vrijeme glasanja). Tri poslanika su glasala protiv, a 9 se uzdržalo.

Prilikom glasanja po entitetima, za Izvještaj su glasala 4 poslanika iz Republike Srpske, a 13 iz Federacije Bosne i Hercegovine.

Predsjedavajući je konstatovao da je Izvještaj dobio većinu glasova prisutnih poslanika, ali da nije dobio entitetsku većinu, te da ide na usaglašavanje.

Ad – 6: Izvještaj u vezi zahtjeva Kluba poslanika SDP-a (izdavanje pasoša Mehrezu Amduniju)

Predsjedavajući je podsjetio poslanike da su u vezi sa ovom tačkom dobili tri izvještaja – jedan od ministra za civilne poslove i komunikacije, drugi od zamjenika ministra za civilne poslove i komunikacije i treći od Vijeća ministara.

Zamjenik ministra g. Nudžeim Rečica, informisao je Dom o zaključcima koje je Vijeće ministara donjelo nakon razmatranja informacija koje su poslanici dobili vezano za državljanstvo Mehreza Amdunija.

U okviru ove tačke dnevnog reda učestvovali su Bogić Bogićević; Alma Čolo, Ibrahim Spahić, Miodrag Deretić, Nudžeim Rečica, Nikola Špirić, Abdurahman Malkić, Dragan Božanić, Sejfidin Tokić i Branko Dokić.

U diskusijama je izneseno dosta novih pitanja i zahtjeva prema Vijeću ministara, zbog čega je predsjedavajući predložio da se od nadležnog ministarstva zatraži da u roku od sedam dana Parlamentu dostavi odgovor na postavljena pitanja.

Ovim je prekinuta rasprava o ovoj tački dnevnog reda i završen treći dio 11. sjednice Predstavničkog doma.

Četvrti dio 11. sjednice održan je 09. novembra 1999. godine. Prisustvovao je 31 poslanik – iz Federacije BiH 20, iz Republike Srpske 11. Odsustvo su najavili Ivo Mijačević zbog bolesti, Miodrag Deretić, Vito Rakić, Mara Perkanović, Zlatko Lagumdžija i Ljubomir Zovko. Bez najave su odsustvovali Raifa Alagić i Safet Oručević.

Na početku sjednice poslanik Dragan Mirković je obavijestio Dom da će dva poslanika iz Srpske Radikalne stranke Republike Srpske od danas djelovati samostalno – izvan Koalicije SRS-SDS.

Prije prelaska na rad po dnevnom redu predsjedavajući Mirko Banjac je informisao poslanike o Odluci koju je Visoki predstavnik donio, a odnosi se na ulazak stranaca u Bosnu i Hercegovinu, koja će važiti dok Parlament ne donese zakono o imigraciji i azilu.

Povodom ovog obavještenja diskutovao je poslanik Ibrahim Spahić.

Predsjedavajući je u nastavku podnio Domu Izvještaj Komisije – Kolegija o nastojanju za postizanje saglasnosti o Izvještaju o radu Vijeća ministara za period 01.01 – 30.09. 1999. godine. U izvještaju je konstatovano da je Komisija, nakon tumačenja odredaba Ustava i Poslovnika, konstatovala da Dom nije trebalo da glasa o Izvještaju nego da ga primi k znanju, te da iz toga proizilazi da nema potrebe za drugi krug glasanja o Izvještaju Vijeća ministara.

O Izvještaju Komisije – Kolegija nije bilo diskusije, pa je nastavljen rad po 7 tački dnevnog reda.

Ad – 7: Izvještaj u vezi zahtjeva Kluba poslanika SDP-a

Predsjedavajući Mirko Banjac je podsjetio poslanike da je Kolegij, u skladu sa zaključkom Predstavničkog doma usvojenim povodom ove tačke na prošlom dijelu sjednice, uputio pismo Vijeću ministara, o čemu je danas stigao izvještaj.

Ministar za civilne poslove i komunikacije, Marko Ašanin, upoznao je poslanike o radnjama koje je Vijeće ministara poduzelo u vezi sa predmetnim pitanjem i o odlukama i zaključcima koje je Vijeće ministara donio radi prikupljanja svih informacija o pitanjima koja su postavljena zahtjevom Kluba poslanika SDP-a i kasnijim pitanjima na sjednici. Ministar Ašanin je iznio i teškoće na koje se nailazi u prikupljanju ovih podataka, te da je za sve to potrebno duže vrijeme nego ono koje je traženo od Parlamenta.

U diskusiji su učestvovali Rasim Kadić, Mirko Banjac, Bogić Bogićević, Pero Skopljak, Sejfidin Tokić, Marko Ašanin, Nikola Špirić, Halid Genjac i Branko Dokić.

Poslije diskusije Predstavnički dom se izjasnio o dva prijedloga zaključaka iznesenih u diskusiji.

Prvi prijedlog zaključka – da Vijeće ministara do Nove 2000. godine Predstavničkom domu dostavi cjelovitu informaciju sa odgovorima na pitanja

Kluba poslanika SDP-a, kao i dodatno pitanje poslanika Sejfudina Tokića koje se odnosi na izlaganje zamjenika ministra vanjskih poslova Dragana Božanića.

Ovaj zaključak je usvojen većinom glasova prisutnih poslanika, kao i većinom iz oba entiteta.

Drugi prijedlog, koji je podnio poslanik Špirić - **da se tražena informacija dostavi u roku od 15 dana**, nije usvojen. Za prijedlog su glasala 4 poslanika.

Poslije izjašnjenja o ovim prijedlozima predsjedavajući je pozvao poslanike da se izjasne o prijedlogu poslanika Špirića – **da se formira skupštinska komisija koja će, uz pomoć SFOR-a i međunarodne zajednice, obići lokacije Bočinja i Rujnica radi utvrđivanja činjeničnog stanja vezano za navodnu obuku terorista.**

Povodom ovog prijedloga diskutovali su Alma Čolo, Branko Dokić, Sejfudin Tokić, Nikola Špirić, Halid Genjac, Adnan Jahić i Rsim Kadić.

Poslije duže i veoma polemične rasprave povodom navoda g. Špirića, predsjedavajući je na glasanje dao, kao kompromisan, prijedlog – **da Predstavnički dom Parlamentarne skupštine BiH zamoli komandu SFOR-a da dostavi punu informaciju da li u Bosni i Hercegovini postoje vojni centri za obuku stranih državljana koji imaju i koji nemaju državljanstvo Bosne i Hercegovine.**

ZA ovaj prijedlog zaključka glasalo je 8 od 27 prisutnih poslanika, a 19 se uzdržalo od glasanja.

Prema tome, prijedlog nije usvojen.

Ovim je zaključena 7. tačka dnevnog reda.

Ad – 8: Odgovor Centralne banke BiH na zaključak Predstavničkog doma broj 03-152/99. od 03.09.1999.godine

U okviru ove tačke diskutovali su Suada Muminagić, Nikola Špirić i Sejfudin Tokić.

Poslije diskusije, a na prijedlog Kluba poslanika SDP-a, Predstavnički dom je usvojio sljedeće

ZAKLJUČKE

1. Predstavnički dom traži od likvidatora Narodne banke Bosne i Hercegovine informaciju o razlozima zbog kojih Narodna banka nije kod formiranja Centralne banke bila u stanju osigurati dovoljan iznos monetarne aktive i zahtijeva da se navedu postupci koji su do toga doveli i po čijim odlukama su izvršavani.

2. Predstavnički dom traži od nadležnih institucija Bosne i Hercegovine da dostavi informaciju kako je pokriven nepokriveni dio monetarne pasive, iz kojih izvora i po čijim odlukama.

ZA zaključke je glasalo 18 od 25 prisutnih poslanika. Zaključci su dobili većinu i iz oba entiteta.

Predstavnički dom je usvojio i prijedlog poslanika Špirića - **da se zatraži od Centralne banke da dopuni izvještaj u smislu kontrolne funkcije Centralne banke u odnosu na nepravilnosti poslovnih banaka.**

ZA ovaj prijedlog glasalo je 14 od 24 prisutna poslanika. prijedlog je dobio i entitetsku većinu.

Dom se izjasnio o prijedlogu poslanika Tokića – **da se od Predsjedništva Bosne i Hercegovine zatraži informacija, šta je poduzeto na suspenziji g. Omićevića sa mjesta člana Upravnog odbora.**

Od 24 prisutna ZA prijedlog je glasalo 9 poslanika. Prema tome, prijedlog nije usvojen.

Ovim je zaključena 8. tačka dnevnog reda.

Ad – 9: Izvještaj o Samitu Pakta o stabilnosti za Jugoistočnu Evropu – finansijski dio

Povodom ove tačke dnevnog reda uvodne napomen podnio je Edhem Bičakčić.

Kratko je diskutovao Nikola Špirić, koji je postavio pitanje o finansiranju Samita, na što mu je odgovor dao g. Bičakčić.

Poslije diskusije predsjedavajući je konstatovao da Predstavnički dom predmetni izvještaj prima k znanju i da nema potrebe za glasanje o istom.

Ad – 10: Prijedlog programa rada Predstavničkog doma do kraja 1999. godine

Predsjedavajući Mirko Banjac je upoznao poslanike da Kolegij nije došao do usaglašenog prijedloga programa, te da postoje dva prijedloga, jedan koji je podnio g. Halid Genjac, i drugi, koji su podnijeli Mirko Banjac i Pero Skopljak.

Gospodin Halid Genjac je obrazložio svoj Prijedlog programa, a Prijedlog programa koji su podnijeli Mirko Banjac i Pero Skopljak obrazložio je Mirko Banjac.

U diskusiji su učestvovali Haris Silajdžić, Hilmo Neimarlija, Branko Dokić, Edhem Bičakčić, Bogić Bogićević, Ibrahim Spahić, Nikola Špirić, Jadranko Prlić, Mirko Banjac i Sejfudin Tokić.

U toku diskusije na sjednicu su stigli gospoda iz Vijeća Evrope – g. Peter Bloetzer i Anneli Jaatteenmaki. Predsjedavajući Mirko Banjac ih je srdačno pozdravio i izrazio zadovoljstvo što su našli vremena da prisustvuju sjednici Predstavničkog doma.

Poslije diskusije u okviru ove tačke dnevnog reda data je pauza radi konsultacija članova Kolegija sa predsjednicima poslaničkih klubova i predstavnicima stranaka koje nemaju klubove poslanika.

Nakon pauze predsjedavajući Mirko Banjac je saopštio da je u toku pauze postignuta saglasnost o Prijedlogu programa rada do kraja 1999.godine, pa je prijedlog programa pročitao.

Kratko je diskutovao Nikola Špirić, a onda se Dom izjasnio o Prijedlogu programa.

Program rada za period novembar – decembar 2000. godine usvojen je jednoglasno, sa 30 glasova prisutnih poslanika.

Ad – 11: Izvještaj parlamentarnih delegacija Bosne i Hercegovine u evropskim i ostalim međunarodnim tijelima

Predsjedavajući je konstatovao da su poslanici dobili materijal za ovu tačku dnevnog reda.

U ime skupštinskih delegacija govorili su Edhem Bičakčić, Ana Havel, Andan Jahić, Ibrahim Spahić, Branko Dokić i Mirko Banjac.

Diskutovao je Ivo Divković.

Poslije izlaganja i diskusije predsjedavajući je zajedno dao na izjašnjanje sve izvještaje iz ove tačke dnevnog reda.

Izvještaji su usvojeni sa 25 glasova, a 5 poslanika se uzdržalo. Izvještaji su dobili i entitetsku većinu.

U okviru ove tačke Predstavnički dom je usvojio zaključak koji je predložio poslanik Branko Dokić, a koji glasi:

Predstavnički dom Parlamentarne skupštine Bosn i Hercegovine traži od Minsitarstva vanjskih poslova Bosne i Hercegovine informaciju o popunjenosti diplomatsko-konzularnih predstavništava, principima popunjavanja i licima u službi diplomatsko-konzularnih predstavništava.

Za zaključak je glasalo 28 poslanika, a 2 su se uzdržala.

Ad – 12: Realizacija zaključaka iz Rezolucije o evropskim integracijama i Paktu stabilnosti za Jugoistočnu Evropu

Uvodno izlaganje o ovoj tački dnevnog reda podnio je Ibrahim Spahić u ime Komisije za međunarodna i spoljna pitanja.

U okviru ove tačke diskutovali su Haris Silajdžić i Mirsad Kurtović.

Parlamentu su se obratili i gosti iz Vijeća Evrope, gospodin Peter Bloetzer i gospođa Anneli Jaatteenmaki.

Poslije izlaganja uvaženih gostiju predsjedavajući im se zahvalio na izlaganju i datim savjetima. Zatim je pozvao Dom da prihvati informaciju u vezi sa realizacijom zaključaka iz Rezolucije o evropskim integracijama i Paktu stabilnosti za Jugoistočnu Evropu, sa ispravkama koje je iznio izvjestilac.

Sa 28 glasova ZA i jednim uzdržanim Dom je prihvatio informaciju.

Ad – 13: Poslanička pitanja i prijedlozi

Predsjedavajući je konstatovao da je Domu stigao odgovor na samo jedno pitanje, a to je na pitanje poslanika Miodraga Deretića.

Postavljena su sljedeća poslanička pitanja:

Desanka Rađević:

1. Da li na teritoriji Bosne i Hercegovine postoje vojni centri za obuku stranih državljana pod pretpostavkom da neki od njih čak imaju i državljanstvo Bosne i Hercegovine?

2.. Da li je završen proces konstituisanja komisija Predstavničkog doma, a ako nije, zašto to nije učinjeno?

3. Zašto je praksa da samo postavljamo poslanička pitanja a gotovo nikada na njih ne dobijemo odgovore?

Suada Muminagić:

1. Šta je Vijeće ministara poduzelo na implementaciji Platforme za akciju usvojenu na IV svjetskoj konferenciji žena u Pekingu, i to na nivou Bosne i Hercegovine kao države i na koordinaciji aktivnosti sa vladama entiteta.

2. Da li se svi prihodi Budžeta institucija Bosne i Hercegovine i međunarodnih obaveza ostvaruju u skladu sa Zakonom o izvršenju Budžeta i drugim propisima, a posebno da li se realizuju odredbe Zakona o administrativnim taksama Bosne i Hercegovine?

3. Da li je Ministarstvo civilnih poslova i komunikacija, koje vrši nadzor nad finansijskim i materijalno-računovodstvenim poslovima i o svrsishodnoj upotrebi sredstava svih korisnika budžetskih sredstava, utvrdilo da li se raspolaganje sredstvima Parlamentarne skupštine BiH odvija u skladu sa Zakonom o izvršenju Budžeta, po odlukama nadležnih organa i nalogima odgovarajućih osoba korisnika Budžeta.

Smail Bećirbašić:

1. Podnio zahtjev da se hitno i energično preko nadležnih institucija stave u zaštitu prava prognanih, raseljenih i izbjeglih lica sa područja Republike Srpske u ostvarivanju njihovih zakonskih prava u predstojećem procesu privatizacije u ovom bosanskohercegovačkom entitetu.

2. Zamolio da se otvori više punktova za registraciju birača u inostranstvu i Federaciji BiH, da se pozivi za registraciju objave na cijelom području Bosne i Hercegovine i da se rok za registraciju produži najmanje za 90 dana.

Ibrahim Spahić:

1. Predložio da Parlament nađe način kako da Program pekinške deklaracije realizuje u domenu svoje nadležnosti.

2. Predložio da poslanici Desanka Rađević, Ana Havel, Mediha Filipović i Suada Muminagić, u ime Parlamenta BiH, učestvuju u jednom dijalogu o pitanjima pozicije žena danas u savremenom društvu, koje organizuje UNESCO i interparlamentarna unija.

Predsjedavajući Mirko Banjac je zaključio 11. sjednicu Predstavničkog doma u 18,30 časova.

Sastavni dio ovog zapisnika je magnetogram 11. sjednice. Predstavničkog doma.

PREDSJEDAVAJUĆI
PREDSTAVNIČKOG DOMA
Mr Mirko Banjac